

# TEZAUUR LITURGIC

6 MAI

# SLUJBA SF. CUVIOASE SOFIA SAOULIDIS DE LA KLISURA



MOSCOVA, 2000



# СЛУЖБА

## преподобной матери нашей Софии Клисурской

### НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихирьы, глас 4:

Воспоим и возвеличим ныне, вернии, / память  
преподобной матери нашей Софии, / присно  
предстательствующия о нас ко Господу / и  
избавляющия от вражиих нападений // с верою  
к ней притекающия.

Мати блаженная Софие, / воздержанием  
многим и частыми молитвами / страстей  
взыграния до конца потребила еси / и,  
безстрастия благодать прием, / приятелище  
явилася еси Божественнаго Духа. / Темже духи  
отгоняеши всегда лукавья, // живуще и по  
смерти, Богоблаженная.

О мати преблаженная Софие, / не забуди всех, с  
верою припадающих к раце мощей твоих; /  
поминающе твоя подвиги и труды, тя просим,  
мати преподобная: / не престай о нас молити  
Царя Христа, // да не отлучит нас избраннаго  
Своего стада.

Небрегла еси, мати преподобная, о телесней  
красоте, / тело твое изнуривши постом и долгим

стоянием на молитве, / плотское мудрование  
покорила еси духу, / и, от Бога дара исцелений  
сподобльшися, / подаеши изобильно милости  
Божественныя; / веруем же, яко по  
преставлении сугубую имаши благодать, //  
молися убо, мати Софии, о нас ко Господу.  
Премудрость Божественную стяжавши, /  
Христа возлюбив, София святая, / всяко Того  
Божественным стопам последовала еси, / крест  
взем и плоть умертвив, / живеши, блаженная,  
духом, / и ныне моли даровати душам нашим //  
мир и велию милость.

Слава, глас 8:

Имаши, о мати Богоблаженная София, / велие  
дерзновение ко Спасу, / твоей ради превелией  
любве к Нему. / Его бо ради красная мира и вся  
плотския утехи презрела еси, / добре и  
благочестно в мире поживши, / таже во обители  
Богородицы блаженным житием / ангелы и  
человецы удивила еси / и, дара чудотворений  
сподобльшися, / во иночестем чине  
преставилася еси ко Христу Богу нашему, //  
Егоже моли о чтущих святую память твою.

И ныне, праздника или Догматик, глас тойже:

Царь Небесный:

Вход. Прокимен дне и чтения.

Премудрости Соломоновы чтение (глава 3):

Праведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказания бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию потекут. Судят языком и обладают людьми, и воцарится Господь в них во веки. Надеющийся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломоновы чтение (глава 4):

Праведник, аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости, житие нескверное. Благоугоден Богови быв, возлюблен бысть, и живой посреде грешник, преставлен бысть. Восхищен бысть, да не злоба изменит разума его, или лесьть прельстит душу его.

Рачение злобы помрачает добрая, и парение похоти пременяет ум незлобив. Скончався в мале, исполни лета долга. Угодна бо бе Господеви душа его. Сего ради потщася от среды лукавствия. Людие же видевшие и не разумевше, ниже положше в помышлении таковое: яко благодать и милость в преподобных Его, и посещение во избранных Его.

Премудрости Соломоновы чтение (глава 5 и 6):  
Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Присмет всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Присмет щит непобедимый преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят. И от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите,

навыкните, судии концев земли, внушите, держащие множества и гордящийся о народах язык, яко дана есть от Господа держава вам и сила от Вышняго.

На стиховне стихирьы, глас 1:

Добре земное житие совершила еси, /  
преподобная мати Софие, / к Богу любовь велию  
имущи, / к молитвам во дни и ноши  
прилежащи, / постом и бдении плоти  
мудрования смиряющи, / чистотою и  
целомудрием душу украшающи, / ко всем  
кротость и смирение являющи, / темже в  
Небесных обителех ныне водворяешися, //  
присно молящися о чтущих тя.

Стих: Воззваша праведнии, / и Господь услыша  
их.

Волн мирскаго мятежа уклонившися / и в  
пристанище тихое достигши, / во обитель  
Богородицы вселилася еси / и тамо богоугодно  
поживши, / преставилася еси к вечным  
обителем. / Темже, мати преподобная Софие, //  
Христа Бога моли спастися душам нашим.

Стих: Многи скорби праведным, / и от всех их  
избавит я Господь.

Ныне уже прияла еси венец славы от Царя  
Христа, / радость и веселие нескончаемое / и  
наслаждаешися вечным покоем, / молися убо о

нас, мати Софие достоблаженная, / Христу Богу  
нашему, / да всех нас сопричтет избранному  
Своему стаду // по велицей Своей милости.

Слава, глас 4:

Труды многими постническими, мати Софие, /  
покаянием, молитвою и трезвением / поборола  
еси врагов спасения, / в немощи телесе  
женскаго и нищете духовней / совершая твой  
подвиг со страхом и трепетом; / вся сия подъяв  
Бога ради и в угоду Ему, // восприяла еси  
благодать Духа Святаго, всечестная.

И ныне, Праздника или Богородичен, глас  
тойже:

Призри на моления Твоих раб, Всенепорочная, /  
утоляющи лютая на ны востания, / всякия  
скорби нас изменяющи. / Тя бо Едину, твердое  
и известное утверждение имамы, / и Твое  
предстательство стяжахом, / да не постыдимся,  
Владычице, Тя призывающи, / потщися на  
умоление Тебе верно вопиющих: / радуйся,  
Владычице, всех Помоще, // Радосте и Покрове,  
и Спасение душ наших.

Тропарь, глас 8:

Божественною Премудростию свыше осиянна, /  
мудрования мирская пренебрегши, / вселилася  
еси во обитель Богородицы, мати блаженная  
Софие, / и процвела еси добродетельным

житием / и принесла еси Богу плоды иноческих трудов твоих, / сего ради Христос Небесных даров тя исполни, / их же низпосли и нам, мати преподобная, // и посети нас любовью своею.

## НА УТРЕНИ

По 1-м стихословии седален, глас 1:

Поет Богу Церковь и обитель Приснодевы, /  
днесь ликующи в памяти твоей, /  
Богоблаженная мати Софие, // и верою славит великия подвиги твоя.

Слава, и ныне, глас тойже:

Едина истинная христиан Покровительнице, /  
всяких лютых обстояний, / бед и скорбей нас избави // и молитвами Твоими спаси души наша.

По 2-м стихословии седален, глас 2:

Доблественне Богу работавши, / злокозненнаго врага низложила еси / и в терпении мнозе земное житие препроводила еси, преподобная Софие, / и ныне радостно предстоиши Престолу Господню, // молящися о всех нас.

Слава, и ныне, глас тойже:

Устами и сердцем величаем Тя, / Матерь Божию: / Ты же, рождающая Бога, // не отрини нас от Твоего заступления.

### Величание:

Ублажаем тя, / преподобная мати Софие, / и  
чтим святую память твою, / ты бо молиши о нас  
// Христа Бога нашего.

### Псалом избранный:

1. Терпя потерпех Господа, и внят ми, и услыша  
молитву мою. 2. Бог нам Прибежище и Сила,  
Помощник в скорбех, обретших ны зело. 1.  
Многи скорби праведным и от всех их избавит я  
Господь. 2. Приведутся Царю девы, приведутся  
в веселии и радовании. 1. Девы да восхвалят  
имя Господне. 2. Суди ми, Господи, яко аз  
незлобою моею ходих. 1. Испуסי мя, Господи, и  
испытай мя, разжи утробы моя, и сердце мое. 2.  
Да не погубиши с нечестивыми душу мою. 1. Аз  
же незлобою моею ходих, избави мя, Господи, и  
помилуй мя. 2. Нога моя ста на правоте: в  
церквах благословлю Тя, Господи.

### По полиелеи седален, глас 8:

Плоть распяла еси со страстьми и похотьми, / и  
всем сердцем возлюбила еси Христа Бога, / и  
все желание к Нему устремила еси, преподобная  
мати Софие. / Темже прияла еси неоскудный  
дар исцелений: / от человек бо изгоняеши бесы  
и здравие в болезнех скоро подаеши, //  
водворяющихся в Небесных селениих.

Слава, и ныне, Богородичен:  
Пророцы Тя предвозвестиша, / апостоли  
проповедаша, / мученицы прославиша, /  
святителие ублажиша, / темже и мы с ними  
Богородицу Тя исповедающе, // благочестно в  
песнях величаем.

Таже степенна, 1-й антифон, глас 4.  
Прокимен, глас 4: Терпя, потерпех Господа, / и  
внят ми, и услыша молитву мою. Стих: И вложи  
во уста моя песнь нову, пение Богу нашему.  
Всякое дыхание: Евангелие от Марка, зачало 37.

По 50-м псалме стихира самогласна, глас 6:  
Твердое изволение Богу усердно служить имела  
еси, / преподобная мати Софие. / Темже ни  
мирскаго жития широта, / ни скорби теснаго  
пути подвижническаго / отнюд не возмогоша от  
любве Божия отлучити тя, / но, добрым  
подвигом подвизавшися на земли, / славу  
улучила еси на Небесех, / идеже присно  
веселящися, // моли Бога о чтущих тя.

Канон святыя, глас 2.

Песнь 1

Ирмос: Грядите, людие, / поим песнь Христу  
Богу, / раздельшему море, / и наставльшему  
люди, яже изведе из работы египетския, / яко

прославися.

Спасову заповедь послушала еси от юности, премудрая Софие, и жизнь свою нивчтоже вменивши, и крест Господень носити возжелевши, вся земная презревши, на Небесная взор устремила еси.

Божественными сияньми душу твою озаривши, сладострастие плоти попала еси воздержанием крайним, блаженная мати, воспевающи Христу Богу песнь победную. Уязвившися желанием бессмертныя жизни и красотою Краснейшаго паче сынов человеческих пленивши твое сердце, во след Его потекла еси верно, Софие Богомудрая.

Богородичен: Светлыми лучами Твоего Сына, Богородице, просвети омраченную мою душу, страстей смущение отжени, Твоими, Чистая, ходатайствы.

### Песнь 3

Ирмос: На камени мя веры утвердив, /  
разширил еси уста моя на враги моя. /  
Возвесели бо ся дух мой, внемгда пети: / несть свят, якоже Бог наш, / и несть праведен паче Тебе, Господи.

Око душевное чисто и здраво имела еси от юности твоей, Софие блаженная, имже всегда зрела еси к Горнему селению, егоже и достигла

еси, и ныне Христу воспеваеши: несть свят и несть праведен, паче Тебе, Господи.

Ничтоже пред Богом вящше есть доброты душевныя. Ты же, преподобная мати, соблюла еси ю непреткновенно, вопиючи ко Христу: несть свят и несть праведен, паче Тебе, Господи. Со молодых ногтей твоих страх Божий имела еси в сердце твоём, премудрая Софие, егоже до конца содержала еси, укрепляема Божественною благодатию, тем и душу твою спасла еси, выну поючи Христу: несть праведен, паче Тебе, Господи.

Богородичен: Прогоняющее оружие грехи и страсти души моя буди, Дево, и покажи мя, якоже другой рай, безнаветен и соблюден Тобою и приносящий цветы Духа.

Седален, глас 2:

Яко всесветлая звезда, возсиявши светолучными сиянии, / просветила еси чудесы своими, Софие достоблаженная, / Святым Духом наставляема, пришла еси во обитель Божия Матере, / в нейже трудолюбно подвизалася еси, страсти плотския смиряючи, / от земных к Небесному селению ныне преставилася еси, преподобная мати, // молися непрестанно о творящих память твою.

Слава, и ныне, Богородичен:

Слово Отчее, Христа Бога нашего, / из Тебе  
воплотившагося, познахом, Богородице Дево, /  
едина Чистая и Благословенная, // непрестанно  
Тебе величающе, воспеваем.

#### Песнь 4

Ирмос: Пришел еси от Девы, / не ходатай, ни  
Ангел, / но Сам, Господи, воплощся, / и спасл  
еси всего мя человека. / Тем зову Ти: / слава  
силе Твоей, Господи.

О, твердое основание веры, о, любви к Богу  
крепкая! В женском бо естестве мужески  
победила еси невидимаго врага и тако угодила  
еси Христу, вопиющи: слава силе Твоей,  
Господи.

Христов храм была еси, преподобная мати  
Софии, твоею чистотою и целомудрием и  
прочими добродетельми, темже вместила еси в  
себе Святаго Духа, к Немуже и возопила еси:  
слава силе Твоей, Господи.

Бдением и пощением, будущаго ради воздаяния,  
люте плоть твою умерщвляла еси, блаженная  
Софии, и ныне чисте зриши Святую Троицу, нас  
подвизая вопити: слава силе Твоей, Господи.

Богородичен: Возсия из утробы Твоея,  
Отроковице Неискусобрачная, Отчее сияние -

Христос, и просвети вселенную, распинаемь, и бесовскую тьму потребил есть.

## Песнь 5

Ирмос: Света подателю и веков Творче, Господи,  
/ во свете Твоих повелений настави нас; / разве  
бо Тебе иного бога не знаем.

Любовию Христовою уязвившись, блаженная  
мати, яко доброплодная лоза в винограде  
Пречистыя Девы процвела еси благими твоими  
деянии и победила еси бесовския полки,  
вопиющи Христу: разве бо Тебе иного бога не  
знаем.

Истинным светом Христовым осияна была еси,  
мати святая Софие, насыщающихся велия  
благодати и воспевающи Его: разве бо Тебе  
иного бога не знаем.

Тебе вси заступницу имамы, преподобная мати  
наша Софие: не престай убо о нас молити  
Господа, да не лишени будем Чертога Его  
Небеснаго.

Яко звезда светозарная, показалася еси, мати  
Софие Богомудрая, блуждающих во мраце  
путеводящая, во искушениях и вражиих наветех  
скорая и надежная помощница.

Богородичен: Закона исполнение, высшая  
Херувим, родила еси Божия Слова воплощена,  
Сына Единородна, Егоже о рабех Твоих умоли.

## Песнь 6

Ирмос: В бездне греховней валяся, /  
неизследную милосердия Твоего / призываю  
бездну: / от тли, Боже, мя возведи.

Воистинну достойна еси похвалы велия,  
преподобная мати Софии, яко в женском  
естестве мужескую крепость имела еси, и  
победила еси супостата диавола, и воспевала еси  
ко Владыце Христу: от тли, Боже, мя возведи.

Яко прах вся красная земная вменивши,  
облеклася еси в рубище и, мирская мудрования  
отвергнувши, ум Христов стяжала еси, Богомудрая  
мати Софии, темже вопияла еси непрестанно: от  
тли, Боже, мя возведи.

О преподобная мати Софии, свеще негаснущая,  
просвети и прослави святую обитель Божия  
Матере и иже любовью твоею в песнях славящих и  
вопяющих Христу: от тли, Боже, мя возведи.

Богородичен: Милости Твоея, Богородице,  
сподоби мя, премилостиваго Слова рождшая,  
своею кровию от тли человеки избавльшаго.

### Кондак, глас 8:

Вся красная мира сего, яко суетная, презревши  
/ и тело твое постом и бдением изнузивши, /  
непрестанными молитвами Богу угодила еси, /  
достоблаженная мати Софии, / и, дар исцелений  
от Него прияти сподобльшися, / многим

недужным исцеление даровала еси. / Темже радостно взываем, глаголюще: // слава Богу, прославляющему святых Своя.

### Икос:

Помощницу скорую, вси, сущи в бедах, / благочестно воспоем, Софию Богомудрую / и песнь принесем Единому в Троице Богу, радуящися, / сподобльшему нас видети пречистое сокровище честных мощей ея, / источающия многая и различная исцеления. / Яко да молитвами ея к Богу / от всяких находящих зол избавимся, / радостною душою и веселием сердца благодарная воспоем, глаголюще: / слава Богу, прославляющему святых Своя.

### Песнь 7

Ирмос: Да преславное рождество Твое, Христе, / еже от Девы прообразиши яве, / неопалимы в печи отроки сохранил еси, / песнями поющия Тебе: / отцев, Боже, благословен еси.

Евангельским словесем внемлющи, крест свой на рамена твоя восприяла еси и Христу последовала еси, преподобная Софии, Тому непрестанно взывающи: отцев, Боже, благословен еси.

Доброты тлеущия, Софии всечестная, небрегла

еси, будущего чаючи воздаяния, и прияла еси славу нестареющую Небеснаго блаженства и веселия вечнаго, Спасителю нашему взываючи: отцев, Боже, благословен еси.

Истинно велие чудо явися в Клисуре, обретение честных мощей твоих, мати преподобная Софие, на исцеление всем, приходящим с верою и вопиющим: отцев, Боже, благословен еси.

Богородичен: Тьмою лютою жития объят быв, соскорбящаго и сболезнающаго не обретох: Твоею, Дево, светлостию разреши тьму прегрешений и озари пети Тебе, Благословенная, Яже Бога плотию рождшая.

## Песнь 8

Ирмос: Пещь иногда огненная в Вавилоне действия разделяше, / Божиим велением халдеи опаляющая, / верныя же орошающая, поющая: / благословите, вся дела Господня, Господа. Ничтоже есть дражайше пред Богом добродетельныя души, еяже весь мир недостоин. Темже и ты, преподобная мати Софие, паче всего прилежала еси о сицевей безсмертней вещи, поющи: благословите, вся дела Господня, Господа.

Яко свещу светлу, уготовала еси кроткую душу твою, Софие преблаженная, темже по смерти твоей многа исцеления недужным излишася от

честных мощей твоих. Сего ради мы вопием:  
благословите, вся дела Господня, Господа.  
Кротостию ко всем землю кротких наследовала  
еси, чистотою сердца и целомудрием Бога зрети  
сподобилася еси, Емуже со всеми святыми  
поеши: благословите, вся дела Господня,  
Господа.

Ум твой к Богу часто возводящи и доброту  
вечнаго покоя смотряющи, плотския страсти  
духу покорила еси и, иноческим образом  
украшившись, мати Софии всечестная, вечное  
блаженство улучила еси, поющи Христа во веки.  
Богородичен: Славы Отчую зарю рождши,  
Богородице, безславием прегрешений сетующее  
сердце мое уясни, и славы присносущныя  
покажи мя причастника, яко да верою славлю  
Тя.

## Песнь 9

Ирмос: Безначальна Родителя Сын, Бог и  
Господь, / воплощься от Девы нам явися, /  
омраченная просветити, / собрати расточенная:  
/ тем всепетую Богородицу величаем.  
Ныне с лики Ангельскими на Небесех  
предстоиши Владыце всех, преподобная мати  
Софии, молящи об Отечестве твоём и о чтущих  
верою святую память твою, недугующим же  
подаючи исцеление от честных мощей твоих.

Тем тя поем и величаем.

Твоих подвигов прияла еси венцы и ныне с преподобных лики на Небесех присно радуешься, поминай убо и нас, Богоблаженная мати Софие, да молитвами твоими сподобимся улучшить Небеснаго Царствия.

Ликует обитель Приснодевы Богородицы, имущи драгое сокровище твоя чудотворящая мощи, мати Софие славная, от нихже, яко от неистощимаго источника, верным точиши исцеления, темже тя песньми хвалебными любовию ублажаем.

Троичен: Едино Естество Триипостасное, трисиянное Существо и неразлучная Сило, Отче, Сыне и Святыи Душе, Едино Божество, спасай верою Тя Единого величающия, Бога в Трех Лицех.

Богородичен: Нам, поющим Тя и верою славящим, и божественному Твоему покрову присно притекающим, подаждь с Небесе разрешение лютых и мучащих страстей, Богоневесто, и муки и суда избави.

Светилен:

Воссиявши, яко солнце, богосиянными лучами, преподобная Софие, струи изливавши исцелений всем, похваляющим твоя постнические труды и дивныя подвиги.

Слава, и ныне, Богородичен:

Света Превечнаго родила еси нам, Христа, Бога нашего, Пречистая Дево, избавльшаго весь мир от лести диавола. Темже молим Тя: не престай молящи, да подаст нам милость Свою в День Судный.

На хвалитех стихирь, глас 1.

Собравшеся днесь, людие христоименитии, /  
возвеличим Христа Бога нашего, /  
прославльшаго преблаженныя Софии  
священную память, / в нейже, празднующе,  
возопиим к преподобней: // поминай нас, мати,  
верно почитающих тя.

Уневестившися Господеви боголепно, / чертог  
Его Божественный в наследие вечное восприяла  
еси, / светолития Небеснаго светлою зарею  
просвещаемая, мати Софии Богомудрая, /  
светлость немерцающую приемши, / озари и  
наша мрачныя души лучем Божия благодати / и  
моли Христа Бога грехов оставление подати //  
чтущим любовь святую память твою.

Благодатию Святаго Духа наставляема к  
желанию Божественному, / Софии, мати  
преподобная, / отонудуже мирскую красоту  
оставила еси / и к разуму истинному возшла  
еси, / болезненный труды возлюбила еси, //  
моли, Богоблаженная, спастися нам.

Окрест стояще честныя твоя раки, / мати  
Софие приснославная, / песни хвалебныя  
приносим ти по достоянию, / яко молитвеннице  
за нас у Престола Господа славы, / дары  
целебныя неоскудно подающей с верою к тебе  
притекающим, / ихже не лиши и нас,  
требующих твоего заступления, // и молися ко  
Господу о чтущих святую память твою.

Слава, глас 8:

Колесницею добродетелей / востекла еси в  
Горняя селения, / мати Богоблаженная Софие, /  
нам же честныя мощи твоя, / нетлением  
процветшия и чудеса точащия, / яко наследие  
богатое, оставила еси. / Темже, лобызающе их,  
светло празднующе, молим тя: // молися выну  
ко Господу о душах наших.

И ныне, праздника или Богородичен, глас  
тойже:

Владычице, приими молитвы раб Твоих / и  
избави нас от всякия нужды и печали.

Славословие великое и отпуст.

## **НА ЛИТУРГИИ**

Блаженны от канона песнь 3-я и 6-я.

Прокимен, глас 4: Святым, иже суть на земли  
Его, / удиви Господь вся хотения своя в

них. Стих: Презрех Господа предо мною выну,  
яко одесную мене есть, да не подвижуся.

Апостол к Галатам, зачало 208.

Аллилуиа, глас 4: Воззваша праведнии, и  
Господь услыша их, и от всех скорбей их избави  
их. Стих: Многи скорби праведным, и от всех их  
избавит я Господь.

Евангелие от Матфея, зачало 104.

Причастен: Радуйтесь, праведнии, о Господе,  
правым подобает похвала.

[Служба преподобной Софии (Саулиди), старице  
обители Пресвятой Богородицы в селении  
Клисура (†1974, память 23 апреля / 6 мая),  
составлена клириком г. Одессы **протоиереем  
Илией Тетерько**]

